


觚庵詩存

庚申十二月

能庵詩存

陳曾壽題



船

庚申十二月

Digitized by the Internet Archive
in 2010 with funding from
York University Libraries

屋
詩

存

陳曾壽題



庚申十二月

觚庵詩存

陳曾壽題

藥如蜂蟻

蜂蟻

蜂蟻


戊午夏及秋之交余病血下泄觚庵亦臥病滬濱皆幾死其九月觚庵遽脫病來視余留十餘日而去逾一月自滬之湖上復暴病竟以不起走哭還取其生平詩草稿審訂別爲若干卷付刊印觚庵少年能詩自矜重通籍浮沈輦轂間後官江南官贛官甘肅所作僅有存者退隱後詩乃稍多遭遇巨變辟世孤往而然也余嘗以爲辛亥之亂興絕義紐沸禹甸天維人紀寢以壞滅兼兵戰連歲不定劫殺焚蕩烈於率獸農廢於野賈輟於市骸骨崇邱山流血成江河寡妻孤子酸呻號泣之聲達萬里其稍稍獲償而荷其賜者獨有海濱流人遺老成就賦詩數卷耳窮無所復之舉冤苦煩毒憤痛畢宣

於詩固宜彌工而浸盛然海濱流人遺老跼蹐番市樓
壁之下類足迹不窺境外觚庵則金陵有宅青溪上鄰
於余復築廬杭之南湖與陳君仁先爲鄰歲月之往還
游賞之頻數出一篇輒有爲余與仁先所驚歎者蓋觚
庵詩感物造端攝興象空靈杳藹之域近益託體簡齋
句法間追錢仲文當世頗稱之觚庵亦或幽獨自負其
信有無忝於後人之相知者耶嗟呼觚庵晚耽詩略與
余同而佗僚猶甚於觚庵猥爲之稍勤忘其昏且鈍楮
墨傳視觚庵亦不以爲非焉然而生世無所就賊不得
殺瑰意畸行無足顯天壤僅區區投命於治其所謂詩
者朝營暮索敝精盡氣以是取給爲養生送死之具其

生也藉之而爲業其死也附之而獵名亦天下之至悲也校觚庵遺詩訖爲發余所愧而推論之如此己未四月陳三立

觚庵詩存卷一

山陰



恪士

出都宿楊村作己卯

落日下寒沙征夫猶未息羸馬帶西風行行度平隰豈
畏跋涉艱但憂時事棘土瘠稻梁稀饑鳥投林急憶昔
別家時淒風入庭室我父病在牀母扶幼弟立謂兒將
遠行願兒自愛惜汝舅在閩海見我恐無日念我病且
衰見汝心尤切弟妹各淒然回頭向暗壁幼子牽婦衣
呱呱爲我泣相送各無言皇皇日將夕出門從此去一
棹浮空碧載涉閩海濤舟輪御風疾登岸見我舅沐髮
猶未畢遙憶我母容見舅心滋戚我母齒盡脫我舅髮

全白俛仰二十年悲愉感今昔六月到京師囊空嗟旅
食寄生憂患初冥心赴沈摯昨夢到庭闈慰我久離別
旅思凋華年春暉警淒魄名場勿自誤去去復何恤昨
夜始出都徬徨宿古驛秉燭理殘書風勁檐霜積偶檢
舊寒衣縫紉千鍼密豈必貴此衣吾母勞筋力衣痕日
以舊游子尙行役披衣步中庭一步一淒惻關河多浮
雲茫茫天地窄

曉發南津港

蓬穴露光圓遠嶼濃欲滴烟披沙草微孤棹弄寒碧泛
泛入空明前帆去不息乾坤日摩盪泱莽衆流匯水氣
曙濛濛俛仰星斗逼日躍天無根金光射萬隙蛟龍失

曉睡采錯周六極風撼城勢低天水相扶翼浩蕩積氣
中震駭資定力霞氣鬱不騰平視坤輿側翩然一鳥下
萬里風瑟瑟

舟發萍鄉遇雨

庚辰

趨柁避風沙雨勢壓絕壁萬木噤無聲石氣濃欲滴層
陰失象緯猿鳥各悚息側疑坤軸陷俛咋雷電逼山頽
萬竅號雲水遞呼吸始覺澄潭腥恍聽幽巖泣迴慮抱
深憂遠矚愁六極雲破日氣蘇萬象復森立水際一鐙
來清光散空溼冥會歛衆囂存神偶寥寂

萍鄉泛舟至淥口道中作

春華不相待烟草自萋萋一棹入溪曲亂雲啼竹雞歸

途如夢覺山影向人低落日亭亭下無愁意亦迷
歷歷江湖晚幽花只自妍亂峯爭受月遠水暗生烟鄰
火增新感灘聲熟夜眠忽成秋意思春夢在愁邊

鴻嗷歎

洪濤穴鼉鼉岸圯江流橫落日散寒烏泊舟心轉驚吹
荻蕪殘火四望無人行老翁七十餘煢煢草底生道昔
乾嘉時舳舻控襄荆民富隄質堅商吏同經營自遭粵
匪亂江岸無完城生聚十餘年稍稍理農耕泥淤河身
高土薄地利輕前月忽晝晦隄決沙水并天地戰寒濤
土木蛟龍爭頽垣掩白骨冷竈灰燼平倉皇語未竟四
野聞哭聲幼兒初學舌向客乞殘羹隨身無餅餌對此

難爲情酸風颯然來壞木啼倉庚

饑鳥下林木哀鳴念其雛寒風聚野寺官吏當門呼斂
籌散米粥繞岸聞喧呶瘦男忍饑臥病男步趨趨翁媪
泣且行呼兒待路隅行遲粥糜盡殘瀝不滿盂一盂繫
四命難潤中腸枯相視不忍食欲食還踟躕牽衣乞過
客願鬻兒爲奴但願兒食飽全家無所需阿母不忍別
丁甯淚模糊尙恐兒衣寒爲兒縫破襦

悲憤

甲申

痛哭瞻依日艱難百事磨撫棺兒已大垂死累偏多獨
夜愁風雨空村掩薜蘿生平悲菽水未忍說鳴珂

寄如皋呂士雲

乙酉

憶昔同車趁殘月天街鈴語秋煙隔禁門初日飛赤輪
擊鼓騰騰曙星沒愁痕零亂出都門劍光鐙影同淒惻
風塵萬事墮冥昧何須氣短劉蕡策還家哭父淚血枯
十生九死惟默默麻衣跣足別我去渡頭寒日慘無色
中年哀樂苦傷神可憐幾輩頭先白由來往事皆如醉
側身敢謂乾坤窄昨者朝廷命大將聞道虎狼盡伏懾
雄風雖指天王旗魑魅何曾膏斧鉞火球激射天如墨
雲枯水立鮫宮熱腥風十丈飛肉血君不見盈廷共詆
和議非師敵破敵窮心機三十年來紛聚訟夕陽樓櫓
空沾衣荒齋有客望南斗莽莽江湖短夢歸

游漢上琴臺

丙戌

烟嶼乍離合流霞翼餘光迴波無盡情原野赴蒼茫天
意惜餘春巖花閼幽香感物情若離藐生迹未忘燈火
壓春流微月生中央濕霧散濛濛鳬雁靜不翔塵外亮
有人解珮凌滄浪

游臺城歸飲秦淮酒樓丁亥

臺城夜夜青燐飛歸馬趑趄烟火微蒼鷹盤空作鬼語
千年輦路春萋萋丈夫慷慨矜奇計那識興亡等閒事
纔上新亭有淚痕又見鐘山擁王氣劫運初回大地寒
愁心疊疊看春山要將肝膽照江海誰放哀樂生波瀾
繁華過眼春心在鶯飛草長真無賴忽漫飄零怨曉風
流光咫尺不相待琵琶彈作清夜游傾囊買醉秦淮樓

城上鐙紅照酒醒鬢邊花好替人愁冥濛誰作五里霧
脩到神仙皆世故閱盡榮枯懷抱孤江關哀怨知何處
絲肉纏綿四座春相逢不忍說酸辛年年一片蔣山月
照見傷心第幾人

登鍾山作

鴻濛鑿元胎地脈鬱王會盤岡若蛇赴躡足出鳥背落
日蕩遙悲烈風奪天隘荒荒孝陵樹陰嶮失拱衛燐飛
隧殿黝哀湍奮沈瀨引睇排重闥雄風詎彫瘵藐茲喋
血場蟻聚爭王氣聚散成古今樂往哀長繫棲霞餘春
姿新亭空雪涕登高我何託色然倚天地到海水無多
卽此悟邊際浮埃蔽城飛渴壁俯睥睨

曉游莫愁湖

層臺吐曙鮮大星沒城頭理帶愉晴皋攬思惓湖樓柵
響夢乍離孤花照深愁晻曖兵氣蘇墟墓散羊牛波光
自含蓄遙情蕩未收簫鼓戀天風清歌遞繁憂離離尋
墜歡依依怨川流委化怡春情此意長悠悠

留別秦淮作

野色依依入露荷分明昨夜醉聞歌遙憐水閣疏鐙上
漸覺南朝夕照多滿眼江山生福慧幾家烟柳弄婆娑
清愁莫放鴻濛破但到人間總逝波

武昌道中

江流東百憂雲光媚初夕綿綿惓水木清響倏已隔江

城延古歡攬裾怨將別廣術暖寒烟殘陽收遠色馳望
忽迷方忉怛感行役委颿溯歸風虛舟羣動息明星露
窈窕山巒亦悱惻哀樂乘天倪情瀾渺不竭泠泠懷遠
度黯黯徇前迹薄暮猿鳥啼江湖不可測瞻望窮崦嵫
婉孌遲明發

送仲林歸通州

晨風吹林散寒雨星落城頭撻大鼓怨逐江南江北雲
往事煩冤向誰語頗傳海上旌旗新深語沈沈四座昏
魏徵嫵媚有才辯可憐熱淚垂向人狂吟痛飲酒盈甕
醉膽輪囷壓愁重君歸淮上我洞庭決莽中原真一夢
古人棄我如秋煙起看孤日當高天丈夫惜別近佻細

可堪哀樂將中年登高元氣滿天地城闌下繚烏絲細
還應閉目向時人何事憂傷不如意君看華髮照春波
愁心婉孌山如螺十年俛仰歷千劫零落江湖哀怨多

寄和范仲林秀才

故人別我無消息江頭日日愁風色莽眇關河又一時
飄忽春光不相接悲歡黯黯思昔游脫帽笑指禰衡洲
無端落日照離別從此煙波各自愁眼前搖落知誰勁
可憐懷抱向人盡歧路相看泣弟兄天涯况復憐貧病
由來人事儘堪憐岸然氣與浮雲連乾坤萬態震頑懦
幾輩佼佼稱時賢書生睥睨真成誤婀娜如君有深悟
性情以外百不營婉轉深心託詞賦知君歲晏愁感多

放眼天地同坎坷江天醞釀好風格只今回首同蹉跎
瀟湘夜黑雨聲急荒荒往事成追憶獨掩深屏剪燭看
檐花亂落春風細可憐歲歲泣春風況復孤兒途路窮
人生何處論知己掩袂東望愁飛鴻

寄懷王木齋秀才戊子

生死心誰託艱難道未孤沈吟惜遙夜哀豔滿江湖身
外閒雲墮愁邊一雁呼更誰覓譙秀淒惻到寒蕪
因循不自覺慷慨一登臺身世成孤注寒空但劫灰高
原如待我落日有餘哀此意無人見江天入酒杯

長沙道中寄懷王木齋

又聽湖陰臥吹笛十年人事真飄忽至人乘物游無窮

今我胡爲但兀兀消盡迴腸盪氣中中原落日看鳥沒
登高臨深有所哀迴薄萬古心無極幾輩詞流擅盛名
心光零亂同墜葉中路因循枉笑人沈吟我亦嗟何及
遙看芳草如有靈神識超然入渺冥萬里歸來真一夢
寥天思遠風泠泠懷人憶事非無故側身天地驚歲暮
此意王郎知我深高歌往往有神悟年去年來湖上行
偃蹇乾坤解送迎請看白日下垂處盡是人間今古情

夜坐寄懷三弟己丑

亦無愁可說庭院坐微陰孤露憐渠幼三年獨此心漸
成生世感悔涉江湖深同是離羣淚哀鴻有斷音

晚泊鴨欄磯壬辰

解屋言存卷一
一燈紅起寒流外身世無端接混茫不信星辰隨地轉
獨憐鴻雁入天荒雄風作勢吞雲夢清角流哀下岳陽
遠望低吟總無奈中原落日卽滄桑

寄懷舍弟兼呈肯堂

甲午

側身驚見孤飛鳥落日無根大地懸原野高寒愁集霰
弟兄南北各潛然噤人亂角從空下背郭幽花抱露眠
斜睨五洲成獨醉朔風吹海又殘年

送黃孟樂袁叔瑜下第南歸

窅然廣莫費搜尋不信虞淵返景深役役終知孤憤在
星星同惜二毛侵養生豹毅無兼術歷劫蟲沙有道心
莫漫江湖悲瓠落此身原是不祥金

贈曾重白

世上悠悠競儒墨可憐於子惜飛騰誰吹落絮漫天際
看轉風輪在下層花落花開春似夢人歌人哭帝何能
鈞天醉後無從問坐息南溟待大鵬

贈嚴鐵吾水部

小辯斤斤出塵垢羞從人海證悲歡承竿直可忘蜩翼
隱几何妨作鼠肝人去虛幃通萬籟花深明月動微瀾
觀生我更支離甚自把新篁作筍看

送友南歸

市聲忽觸微茫感帶雨飄燈共此心笑我忘形託人海
送君連日坐春陰眼中歷歷昏鴉滿世外冥冥落照深

便擬遙情託毫素微塵無地著沈吟

甲午五月天津感事詩和慕庭先生韻兼示朝鮮

使者

積水晝冥冥孤危見一星日光浮地盡風暈隔河青絕
島天如繫連宵雨不停泥中更憐汝含涕出都亭

更無人擊筑又見鬼含沙隱約聽風樹遲回踏浪花萬
方悲墜葉一角挽明霞長白連秋氣艱難歸路賒

飄忽看生事無端泣路人懸燈愁照海收網勸垂綸惻
惻思全盛依依望重臣風雲悲鬱律愁見九方歎

和范肯堂兼示李剛己

自我來天津一日課一詩出門泥沒踝峴屺窺天倪登

高夜氣靜得此晨風吹日光附大地萬象皆離披拓境
無留影一隙天所悲悚身伺其間寸寸還自持百年太
散漫魂魄遂從之卓哉范長公黯澹天人姿談詩有餘
地割取晴空絲及門盡賢達李子尤恢奇深談破蒙翳
真氣相因依悠悠人間世擾擾長安兒道德偶中人耳
徇心爲疲何哉寂寞中獲此真支離

甲午天津雜感和姚慕庭先生原韻

滅燭天光入乾坤絕可憐獨成心皎皎深坐夜淵淵送
日息羣動填胸哀昔賢搏精塵壒外暫比入山便
寂寞真相喻甯知范子豪危言傷大隱一髮繫吾曹激
詠物情好披風衆竅勞深心無不在孤睨一星高

太息幸餘老徜徉萬劫場窅然心不競孤處古相償往
者論先德謂惜抱先生天心或未亡斯文各深淺吾道此低

昂

久雨荒生事人煙慘淡中連林答沈響虛枕引低風蝶
影移燈入蜂房隱壁空就乾得生理此意倘吾同

屋角喧新漲牆陰煮霧茶雲來失雙燕泥泛沒輕花四
野日光薄九河風力加近堤農作苦昨歲已無家

談詭人間世雛夷髮盡青憤時終自放莊語待誰聽兵
氣纏蝸角天聲戴鶴翎仙人緲瀛海招我五霞輶

小別長安市時流一輩多竊鉤真不幸側帽屢相過宏
道命安託橫流爾奈何出門看傀儡飯飽得蹉跎

慶典中朝重賢臣議禮佳星辰羅地軸鸞鳳嘯天街近
惜遼東信終傷義士懷聖人千萬壽四裔在庭階

離家覺軒豁望遠忽潛潛門祚驚心久饑寒合眼間高
天誰見影集霰欲迷山廣漠吾從逝先偷一夕閒
靜坐如有適從知昨者非笠邊疏雨過草背一蟲飛酒
薄心常定談深客不稀八方終炙手吾道竟安歸

食瓜

屏息不知有天地夢夢側視如釜底微聞殿角走輕雷
色然雲物隨人起奴子獻瓜大於瓢持瓜待剖心搖搖
炎風蒸海絕飛輓軍容慘沮燒旌旄堆盤見此晚霞色
眼底清涼不可測避世何人解飲冰稍借甘鮮驅內熱

角眉詩存卷一
一氣毋教遁齒牙終憐肝膽非一家自提血腸理煩鬱
誰言伏暑能抵瑕百骸冥冥我無苦書來吾弟反病暑
對床忽夢呻吟時有兄飄泊真憐汝丞相作勢大用兵
往往海上思飛騰仙人微笑立雲輶堅我寂寞慰弟兄
曾侯祠廟墮煙霧撞鐘伐鼓驚遲暮抱我悠悠一片心
潜然涕灑蒼茫處

和李公子經邁

相看誰挾幽并氣極盛門才有遞增當戶河流風瀾瀾
隔年人到雨騰騰君家憂樂關全局天下低徊想中興
近事忽堪橫涕淚海雲檣燕百無能

我生兀兀且自保但到酒邊皆淚痕未必危言關大計

可無元氣在高門清時送日吾猶待大地懸河雨亂翻
十丈荷花千畝水甯能相對與忘言

自廈門泛舟渡臺灣海中見夕陽感賦

自浮滄海送殘陽漸覺閒身入莽蒼一掬酸辛成獨往
無邊天水共微光風檣隱隱開元氣朔鴈聲弔戰場
淒絕一更初魄語故人相望涕成行

甲午除夕登臺北城樓

瘴外日光芒角動殘年出戶晝常陰寥天有此登高興
暮雨飄殘隔歲心役役談兵清議在冥冥入世幾人深
迷離爆竹千家晚鍼孔光陰耐苦吟

登廈門南普陀和易實甫原韻乙未

解庵詩存卷一
登臨初見海嵯峨回望神州感逝波坐久自疑趨大壑
再來應恐泣磐陀愁邊草樹天風急淚眼乾坤落照多
今日五洲成大夢獨留殘夢在巖阿

韜光寺丁酉

日射韜光頂石寒烟不消曉星穿石筍高樹隱山橋自
此入蘿徑何心對海潮諸天鐘梵寂覺後總無聊

自韜光至靈隱

架竹引泉脈因松作雨聲亂雲隨我駐孤月爲誰行澗
合雙流急巖窺一綫明四山如睡覺高處一峯晴

天竺

言從天竺寺偶步下雲房新霽鈴聲活晨炊松葉香片

雲駐靈石一鳥答松篁簷蔔花仍在禪心但坐忘

和宋燕生

戊戌

相逢且各開懷抱涕淚乾坤百事艱
悵養成真氣節沈吟莫負好江山
情深枉自傷哀樂物競何從辨聖凡
我自支離託人海介乎才與不才間

誰持下界三千劫衆口悠悠只自驚
別有性情求史隱略通憂患著棊經
厭聞亂角隨風轉坐送殘陽看月生
歌哭未終人事改古今同是百無成

幾人流涕談新政我自低徊謂子賢
哀樂盡時忘孔墨國身通後見人天

用董子意

微波脉脉歸滄海棄木森森得

大年倘謂時艱求息壤人間何處有桑田

自清溪泛舟至寥山草堂分韻得堂字己亥
有約惜韶光酒香花滿堂斜陽寫哀豔春意在微茫持
此與靜者相看誰老蒼映波最惆悵初過少年場

寒食日續游用前韻

病起逢寒食春從寂寞償酒邊雙鬢改花底一星藏送
日更誰待聞歌聊復狂高談破蒙翳微月在溪堂

鮑菴詩存卷一終

觚庵詩存卷二

山陰 俞明震 恪士

登狼山 癸卯

獨抱沈憂向滄海且登孤塔送斜暉
回看城郭依依在
賸覺江山種種非
斷港煙昏潮暗上
諸天風定鳥高飛
哀時別有人天感
一笑相忘立釣磯

山後疏林風日幽
山前奔浪接天流
情難自遣登樓好
生本無涯到海愁
旦暮承平容小隱
英雄芻狗有千秋
人間散漫成今古
了卻閒身盡白頭

甲辰六月十六日登天童山訪寄禪長老不遇留

贈二首 甲辰

我到深山公入世
人天哀感未分明
中年萬事不掛眼
靜夜一燈微有情
碧海沈沈那有岸
秋蟲唧唧徒聞聲
玲巖星暗諸天寂
待汝歸來看月生

人世至今無可說
相逢端合話來生
交空四海公垂老
愁入深山雨易成
料得歸來應有淚
不因禪定便無情
華嚴法界人能到
容我蹉跎聽梵聲

待寄師不至留居山中七日

此來真隔世了了
悟初心入谷窺天
近因松坐雨深秋
蟬悲旦暮山鳥課
晴陰好景無真相
君聽流水音

百轉通靈境雲陰
隔翠層蹉跎吾到
海蒼莽汝爲僧古
樹忘枝葉羣峯有
愛憎偶然會名理
何用說傳燈

寺樓深不見寥廓遞斜暉
泉向雲邊冷僧從雨外歸
低徊清夜磬悽惻故山薇
偕隱吾誰託中年百事非

再題方丈壁

高樹一蟬催晚晴去年同汝聽
秋聲離愁不入華嚴界
立向西風卻又生

別天童則悟禪師送至太白嶺留贈

真意久寥落空山覺汝賢
世情真說夢高處但悲天
戀戀辭清梵行行感逝川
何當謝塵網相對共忘年

重過洞庭

丙午

早涼催雨渡湘波重見湖陰舊
薜蘿風月至今仍跌宕
江山如我總蹉跎孤城莽莽愁心疊
野日荒荒落雁多

天際一星明向我
混茫無地著悲歌

四月十四日招秦伯虞鄧熙之陳雨生并攜琴師
王耀先泛舟秦淮

秦淮初夏景夷猶
薄雲陰宿雨收
煙水有情諸老在
鶯花如我一春愁
故家文物存芻狗
一代人心幻土牛
斟酌古今琴韻好
任他簫管在高樓

丙午入都迂道至長沙十月十六日舟過籐洲

落月懷人無限情
起看江色未分明
霧中但見千帆頂
天末微聞一雁聲
得免飄零兄弟老
深於哀樂古今平
艱難幸踐聯牀約
但恐重來白髮生

登園亭感賦丁未

一片傷心萬柳絲晚晴新綠上鬚眉醉看殘日悠悠下
坐聽鳴蟬悄悄悲花底炎涼俱有味眼中陵谷更何思
從今記取蘇龕句忍淚看天到幾時

雨中登樓贈伯嚴

閉門三日天如醉極目消魂是此樓絃上忽驚飛鳥逝
雨中無數遠山愁清時了了花猶媚大地冥冥樹已秋
知否匡廬煙霧裏有人袖手看神州

峽江道中

空際又收斜照去人間惟有百憂侵荒城近水知寒早
醉眼看天覺淚深身外波濤隱高樹夢餘燈火悟初心
灘聲嗚咽鴉啼急四十年前枕上音

解庵詩存卷二
三
鬱孤臺

秋風吹上鬱孤臺鼓角聲低萬井哀事過羣山如夢醒
天空一雁破愁來蠻巫醉飽教歌舞短日荒寒下草萊
耕鑿但知忘帝力閉關終古是凡才

八境臺

層臺窅窅壓驚流又作閒身半日留鷗鷺去人如避世
江山知我此登樓愁邊雙塔滄桑影霜外寒林粉墨秋
莫向棋枰數殘劫醉看斜日下松楸

贛州雜感

共說趨炎地曾無釀雪天蟲沙真厄運冤憤有殘年客
去心常醉愁深月不圓棲遲聊復爾得地草堂偏

自昔存祆教深山鬼國迷結成衰世果愁到萬家啼失
計冤魂盡驚寒日脚低回光餘一照仍見雨淒淒
隱几悲生事披衣聽曉春市聲含慘淡官計但彌縫巫
女醉談鬼蠻花紅耐冬養癰在窮谷遺恨到寒蛩
後事真難問前因更可哀幾人收涕淚一雨長莓苔霽
影山圍住風聲雁帶來誰教民氣塞遠望一登臺

通天巖

但見九州大安知巖壑深不有登高興安知天地心少
壯背人去瞥如鳥投林竦身伺日影一息皆精神回光
射叢薄細路披碎金暫與滌煩冤遺此一寸陰百轉出
寒霧隱隱浮城闌晴雨失氣候萬態含酸辛惜此物力

皐鬱塞無冬春嶽嶽姚江叟教養開蕪榛欲民通生計
先使變土音豁蒙卽治理閉關皆弱民我來理冤憤百
屈不一伸高天照冥昧後起無哲人生平悲憫懷望遠
情倍親况茲值歲暮歸心如轉輪

冬夜偶成

多少殘年事蹉跎著此亭風從螢處定山到雁邊青夜
久得坐理水寒無動形向人枯樹在如欲訴飄零

鬱孤臺寓齋

檐角一鈴呼鳥還殘宵歸夢轉清閒風聲到枕思鄉樹
月色愁人有亂山一念可教滄海變百年真到鬢毛斑
因循聊作鴻荒想身在千巖萬壑間

長夜吟

空江夜坐雲崔嵬合沓羣山如馬來眼前瞬息恣萬變
胡爲墨守相爭猜新民有術不能道滄桑一劇悲者笑
鬼神畢竟誤蒼生迷信何曾有宗教達官解事但形模
憲法不啓愚民愚百年積弱有天意朝三枉自尤羣狙
灘頭水寒千丈落頽波散盡趨大壑洗滌山川有雨聲
莫訴煩冤向寥廓盤空大地如車輪日光所被物態新
若使地軸不自轉誰是茫茫長夜人繁霜夜隕烏啼苦
荒江此境成終古錯怨東方不肯明那識西天日方午

贛江曉發

荒灘有客夜推篷江入羣山一線通向曉燈光斜月裏

解題詩存卷二
殘年心事亂流中將衰微覺悲歡異無睡方知天地空
忽漫相逢有歸鴈哀鳴無奈五更風

曉發廬陵

破曉時聞孤鴈鳴關心猶記去年聲出林微月知人意
附郭名山有世情望遠殘燈隨念沒臨流一樹傍愁生
人間萬事閒經過賸有詩心鬱未平

泊吉水三曲灘

暮天羣動息惘惘惜孤清岸柳愁中老檣燈雨外明悲
來已陳迹何處著平生惟有星星髮催人心暗驚

鬱孤臺晚眺

戊申

隱約鐘聲雜市聲又看斜日下重城人前惻惻無高論

江上悠悠入晚晴憂世但知來日在倚樓真覺一身輕
棲鴉流水成終古吟徧秋光識此情

劉芋山招飲鬱孤臺感念近事贈同座諸紳士

城角炊煙一片愁眼看生事但悠悠人無肝膽常如客

山有晴陰各自秋千畝瘴開留晚照

時新闢農業試驗場

雙江水

涸笑清流因循我更慚諸子猶有閒情付嘯謳

偕劉月農登八境臺示同游諸子

衙居絕朋歡乘興策游騎步上八境臺恍如脫拘繫鬱
鬱瞰孤城脈脈延秋霽生年去飄忽憂患天所寄彌望
結層陰人煙墮冥昧帆靜如有待鳥驚若相忌暝色赴
依微岡巒互睥睨萬感入遲暮宦游非我意坐對好江

山寧爲百年計此邦多達人所悲在民氣吾子憂患身
抗心赴沈摯至人通羣情毋憂負俗累

步月偶占

低簾燈影映殘荷別夢依依奈遠何夜久一螢深入露
月明雙眼靜生波庭前獨樹看人老天外愁雲任鳥過
欲逐清輝向寥廓秋風心事更蹉跎

城頭望夕陽西沒感賦

爲願殘陽墮地遲望中燈火轉迷離羣山偃蹇都能隱
雙雁迴翔何所悲一暝欲收江海去回頭如接混茫時
籬邊賸有微光在珍重秋心好自持

戊申十一月重游通天巖留宿山寺

深巖一穴天光聚怪石當人如虎踞荆棘相看已隔年
洞中石佛真頑固高飛一鳥破鴻濛澗底雲烟失攀附
層巒椎魯無性靈點綴遙情出寒樹山色寧知遲暮心
斜陽不到無人處誰持肝膽照荒寒賸有悲歡支世故
晚鐘催客入寺門草背燈光如綴露山僧向我說靈怪
夜深暫爾清百慮臥聞石齒漱泉聲缺月微明四邊霧
巖顛忽吐銀色雲曙星隱約在庭戶半世勞勞向曉心
一枕深深佛前炷官如殘夢應自笑人情剝盡隨所遇
萬木不動風有聲晨光慘慘生幽怖入山苦勞出山逸
掉首還尋出山路

改歲四日率兵度梅關賦此己酉

角聲低不揚磴道鬱盤互泉細溼雲根松高倚天柱但
聞白雲香不見梅開處百轉到關門雙巖尙掩護南望
失氣候青青露原樹山勢萬馬騰有力不能馭遂令關
以南天然畫畛域羣盜捷如猱誘我逢鄰怒摧陷失雄
心避縮全世故衆鳥噪夕陽人家隱寒霧誰與辨煩冤
嗒然全吾素

移寓南安郡樓

微覺人間憂患長樹頭寒霧減春光兒時書卷存餘味
靜日江山但坐忘雨脚減收延返照蛛絲何意近雕梁
野梅吹盡無人見辜負高樓一夜香

游了山

雲擁了山尖雙髻不容把影落煙鏡中晴光助妍姸入
山恐不深此景詎忍捨空濛無遠近色相天所假石骨
斂春容怒立拒奔馬披霜萬葉黃背日一峯赭入寺不
知門霧溼鐘磬啞梯樹引泉根泠泠墮檐瓦躡足出叢
薄豁然露平野殘陽淡淡收飛鳥悠悠下中有萬古情
含悲不能寫束身入世程此意待來者

大庾亂甫定偕僚友出游近郊諸山

百轉迷前路從知出世難長愁肝肺熱新霽水雲安閒
淡看僧老艱危逼歲殘在山泉似鏡流作萬重灘
背日山常暗驚風葉亂飛哀時甘泯泯望遠獨依依亂
定羣情見天空一鳥歸忍將垂老淚長此送斜暉

初春雨霽有懷

一峯相向晚崢嶸
霽色猶寒隔霧層
深竹飽聽連夜雨
曲房初見照愁燈
十年影事朦朧記
二月韶光淺淡增
正是江南好時節
海棠紅蕊綻春冰

游空同山遇雨

遠望煙中山秀列
如屏匳近山失態
厯亂沙石兼鼓勇
得細路山勢如相
筊苔潤垂綠髮藤
老張紫髯天然設
危坂惴惴各戒嚴
盤空踏鳥背罍石
欹帽簷橫風驅雨
來密點如膠黏去
寺不十武黝黑萬
象淹俯聽雲有聲
怒挾虎豹潛巨浸
儼在上數峯青露
尖須臾辨天色一
一排牙籤人從樹
杪行魚貫穿水簾
水聲去復返巖

底嘶漸漸萬竅各自悲餘響窮微纖僕夫詎解此過險
徒沾沾轉路覓燈火生增寒霧添回看石壁下新月彎
如鎌

偶題

借得鄰家幾樹陰朝朝呼客聽流鶯敝冠不脫山林氣
弱句先除兒女聲事過名場真一笑雨收斜照爲誰明
留貽無限滄桑蹟惟有韶光畫不成

游空同歸投田家一宿

簷樹參差露晴光炊煙縷縷低渡牆鄉村最好是春暮
家家飯熟松柴香曉鴉笑我脫拘繫繞屋飛鳴解人意
淵淵自惜肝腸深世味無端集垢膩煮茶燒筍邀客餐

解題詩存卷二
八
怕聞父老談辛酸山茶一叢雜瓦礫任他蛱蝶飛成團
別有深情向平野多謝農夫飼歸馬合無人處看春光
相逢同是悠悠者昨宵夢逐孤雲飛山月不動光入幃
陶然自顧壁上影夜氣觸境無町畦朝來滿目悲生事
世亂先愁老將至絮影萍根此一時他年來認空同寺
夜雨書懷

黯黯春光去垂垂老境添雨深燈有暈人靜水窺簾入
世愁兒女思歸計米鹽略諳齊物旨何意問飛潛

去任有期矣三月二十三日分巡至信豐留贈諸

父老

昔遭粵匪亂茲城獨完固鬱鬱五十年遂通南雄路風

氣遞旋轉博鬥爭蟻附父老拜馬前欲語尙瞻顧陋俗
非近因合羣費將護欲預百年計力豈旦昔赴三宿吾
何戀詎曰彌世故天地入塵埃一罅春光聚因之懷物
情百憂競奔注聲聲行不得鷓鴣留我住林外杜鵑啼
道不如歸去山深見日遲晴光阻高樹出谷眼忽明觸
境吾無忤還待後來人悱惻瞻天步

信豐至贛縣溪流曲折舟行萬山中晚泊立瀨墟

遇雨

溪流如帶繞羊腸結束巉巖一線光天地忽收心悄悄
冬春無界景蒼蒼孤螢避影知燈近暗霧籠沙覺草香
消得老來詩境狹萬山深閉雨成行

劉芋山研究農業世居濃溪山水清絕余維舟訪
之所設農業試驗場種樹成陰矣感而有贈

昨過立瀨墟遠見君家樹樹樹含春情迎我濃溪渡濃
溪之水濃於酒山光倒注綠可剖山下溪流鏡面平雙
篙點破魚不驚君家恰在溪山曲濯足溪流飲山綠自
栽松柘亂成行憂來躑躅野人旁直輸心血作灌溉獨
闢虔南樹藝場海天一粟君何補躬耕小稱溪山主但
爲時艱惜好春眼前寸寸黃金土沈吟此際百酸辛我
亦長鑣託命身無田不渡浙江水愁作東西南北人

四月十五日重至南安夜步城頭望月

悠悠人事重經眼瀾瀾溪流舊繞牆明月入懷添悵惻

野禽呼我共蒼茫客中作客知官味山外看山惜夜光
聞道今年漸生聚邊風吹過總淒涼

讀范肯堂遺集愴然賦此

達人齊恩仇沈憂吐珠玉并世毀譽情待向滄桑哭誰
知一卷詩早定浮生局君詩大國土未屑計邊幅精神
在蒼莽萬象生斷續放筆奪天機窅然龍象伏甲午造
君廬飢驅一月宿家貧國多難畏行轉踖踖幽吟互贈
答一放常千曲相知在肺肝影不隔明燭收淚入歡娛
持瑕又抵觸當年篤愛情歷歷詩在目此境不可追此
詩安忍讀墓門宿草深昨夜夢海角

駐大庾邊境萬山中閱南洋報知伯嚴梅庵讌樊

雲門前輩於六朝松樹下卽席有詩次韻奉和
乘溜下絕澗竹筏如怒馬農夫獻家釀酌以牛角罍如
何萬仞山低首荒城下蠻歌迎七姑山中處處有七姑祠銅鼓鬧
春社久與枯僧鄰此景覺妍冶衝風脚力健曝日面皮
赭怪鳥霧中來怒爪墮簷瓦蒼蒼者山川何處界文野
羊茵漸有稜貓筍可盈把雖無李侯饌適口吾聊且一
幅蠻荒圖悲來不能寫亦有百尺松龍鱗尤古雅不放
六朝青遂令知者寡可憐王謝輩同是悠悠者

居南安十日書寄伯嚴

炎方十日悒悒雨斷送殘春作早秋鷺鳥有羣皆獨立
奇峯難畫任冥搜眼前事了未全可胸次月明真不愁

便擬從容理歸棹從君袖手看神州

詞人例作傷時語真感何因入肺腸物論齊無書萬卷
國身通有淚千行羨君遺世換詩骨笑我傾愁揮夕陽
琢句未除文字障不知文字已滄桑

駐南安郡城得京師寄書奉答

入城漠漠風吹雨隱几紛紛鼠跳梁真有性情皆骨肉
斷無哀樂到侯王醒時覓夢知身老靜夜開門聞水香
微覺一峯青向我百年心事久頽唐

章江晚泊

日沒羣峯爭向西片帆東指客程迷江山寥落同螢照
城郭蒼茫與鴈齊久坐欲呼河漢語苦吟如索肺肝題

風含百種淒涼意吹入人間作笑啼

通天巖夜坐書懷

山僧頭未白一樹已飄零石古雲無性潭空月有靈
暮天同脈脈生事但冥冥不識禪關近藏山雨氣青
塵垢含生理因循得道腴書留殘劫在心比古人孤靜
覺天無異愁聽鳥自呼褰裳寧有待迷路滿榛蕪

夏夜山寺納涼卽景偶成

一峯高受雨遠色尙空明露草蟲相語風林月有聲
夜涼貪坐久幽極覺愁生又見晨光動勞勞愧此情

槐樹下戲題

空庭吏散槐陰轉如脫炎蒸雨後秋蟻穴王侯喧午夢

蟬枝風露咽清愁任他病樹連根爨賺我勞生匝月留

卻憶宣南龍爪下

京師南城龍爪槐蔭可一畝

萬人如海影蕭颼

行縣至雩都入山寺避暑夜雨不寐

四圍脩竹一山風避暑人來佛殿空擾攘蟲飛燈影外
微茫秋在雨聲中昨非未必今皆是世短終知境不窮
我比山僧更頑固但將心事付鴻濛

重過樟樹鎮

短日荒荒入亂流隔年重見望津樓檣梢一雁悄然立
天外羣山相向愁論世不妨存幻想微吟時復觸沈憂
支離一覺虔南夢針孔光陰笑白頭

觚庵詩存卷二終

觚庵詩存卷三

山陰 俞明震 恪士

庚戌正月十四日游半山寺次伯嚴韵

庚戌

昨歲古城隅喧闐逐馬迹茲游復何有敗葦如折戟山
僧閱世變惘惘肅行客興來泉悅耳事往塵浣壁偶然
會心處豈必夙所歷笑語得春先餘寒覺晝寂遠望牛
首山小於坐旁石六代興亡圖一一羅几席薄晴有新
意春氣相與白不有江山助風光亦虛擲感念半山老
大名毀所積是非逐世改來者又誰惜明日約探梅回
視今復昔

曉起小園探梅次夏午彝韵

破曉一禽鳴陰陰樹如浴朝霞猶未升但覺天微綠孤
花誰與春幽人夢遙屬煙外一枝寒臙脂點初旭隔斷
板橋塵自補秦淮錄

送馬惕吾赴贛州

垂老將安歸光陰赴頑梗稍通當世務往往自矛盾難
與時人言逢君一吐鯁往者讀明詔燦然具綱領中原
萬鈞弩挽之而射影蒙馬以虎皮一闋終自窘翻羨十
年前民勞俗尙整此意至可傷及身容有幸風氣所趨
重道德司繩準苟適得其反聖哲甘泯泯送君步城隅
惜此須臾景須臾亦何惜來日殊未省且作暫時人淚
盡惟一晒

春寒登樓寫意

雨暗池冰合春寒鳥背高
閉門無世法來日在醇醪
待暝諸天寂因風獨樹號
萬家愁入夜孤影下亭皋

陳善餘徵君撰西石城風俗志復繪橫山草堂圖
徵題橫山卽西石城先生隱居地感賦十六韵
歸之

先生愛鄉土日飲橫山綠
橫山有草堂先生此耕讀
初民知有羣風化基親睦
樂生送死情節之成禮俗
聖者導所趨豈曰新耳目
至味在人倫持此馴百族
子學富九州約之一丘足
躊躇進化理瑣屑有實錄
此義今無聞蒼茫畫林谷
遙知手一編溫溫對樵牧
著意義皇前

甯爲世所咥嗟余志四方動與時抵觸六合新制作謂
可幾一蹴還念居游人冥然自歌哭子非耽隱者類情
反真樸從知避世人甘心友麋鹿

哭宋燕生

泯泯莫如歸死樂眼中人事日喧豗深談直到滄桑盡
閱世甯知孔墨哀孤處論交真悱惻千秋相望在塵埃
牀頭剩有嘔心稿地老天荒著此才

游理安寺

行盡九溪曲獲此煙中岫下臨十八澗土石吐奇秀到
寺不知門風枝接飛溜喬楠千萬株勁與竹同瘦巢鳥
無高心陰陰失昏晝微覺世可悲仰窺天如竇松顛閣

已歆法雨泉可漱

松顛閣法雨泉均寺中名蹟

古意在微茫名山謝

雕鏤憑高納萬態海色上襟袖返照失中峯羣山有遷就吾衰意何擇幽極神轉瞽了知出世難清景付馳驟

游煙霞洞贈學信長老

檐角掛錢江掉頭失西湖意識遠始明近山轉模糊入洞探雨窟結屋通雲衢老僧不說佛清與山同臞了知衆生性料理食與居精神到鹽豉土木神工俱移坐得山情留客鋤春蔬我佛至悲苦度世願已虛師能解世法但取近者娛耳中萬松聲味之成笙竽他山自晴雨吾歸尋敝廬

游山歸泛舟出裏湖待月

山游腰脚疲蹇臥如春蠶漾舟出裏湖霽色明澄潭羣
峯促使暝若戒游人貪一樹尙殘照雨過南山南湖光
不能紫細浪吹成藍濛濛覺遠喧渺渺窮幽探月出天
水分始知風露酣各有愁暮心詩味從可參清景何處
求湖燕飛兩三一失不可摹此意吾甯慚

庚戌十一月出都口占

塵外陰沈覺有霜天東初月照昏黃十年錯料成今日
一醉拚教進急觴高樹亂鴉呼晚霽西山殘雪剩微光
風幡自動心無著留待滄桑話短長

宿新安縣示子言辛亥

我從洛陽來坦途無百里峨峨見城闕嵒陵列屏几車

馬亂流渡隱隱如浮螳莫弔古戰場中原事未已風起
遠天黃落日淡如水況爲行路人茫茫誰遣此須臾日
西匿回光射成紫幻影逐明生饑烏投暗止此是古今
情悠悠吾與子

閩鄉宿黃河隄岸

柳陰見黃河日暮愁客心極目但塵沙不知春已深麥
隴疊成梯層層如劃簪其顛平如掌山態不可尋方舟
壓奔溜榜歌雜秦音遭時苦躑躅十年江海濱沈憂鬥
靡麗厭作東南人此行入蒼莽翻覺眼底新岡陵鬱雄
厚風物含蕭森河聲去不息來日愁因循對此真茫茫
吾衰復何任一鳥意超忽萬里天陰沈心境各殊態勞

者徒酸辛

步黃河隄岸

擾擾悲生事昏昏入晚晴微風生柳態孤雁帶河聲家
遠人垂老山荒石有情漸知天意改翻覺客途平

過醴泉喜晤宋芝棟侍御卽贈

黨論漸寬公亦老相逢百感到平生河山已分成孤注
孔墨何嘗有定評元祐聲名終聖世西京文獻在荒城
尋碑莫上昭陵望

公近拓唐昭陵碑三十餘種

翻憶明良涕泗橫

過邠州

茫茫古豳土直接隴西路我來值蠶月戒行不待曙晨
光與麥齊晶瑩綴寒露微月在棗林不見栽桑處王化

首明農但取衣食足智識與世新生活有程度奈何三
千年穴居惟墽戶日出不逢人高原莽盤互始知地上
人得水乃生聚涇流日淺縮千尺俯塵霧人事漸東趨
天心厭西顧不見古雍州八水已非故滄海變桑田吾
何憂旦暮

曉發邠州

日日征鞍傍柳行柳綿吹盡不聞鶯馬頭微月如雲淡
麥上朝曦與露平陶穴尙存中古制望春忽起少年情
疲驢轉磨駝鈴急喚醒勞人是此聲

隴頭

尋常人事紛如髮况復時艱百態新高柳雨行心萬轉

龍頭黃霧不成春

行土峽中抵會甯行館次子言原韵

與子長安來一月已過半朝發青家驛畏途愁日晏懸
車下絕壁濁流倏瀾漫飛鳥到來深頽雲匿不散槎枒
生地穴破碎撐霄漢仰望白日乾俯穿泥沒骭車從澗
底行心與懸巖亂出險眼漸明停鞭指行館酒注肝肺
熱深談復達旦新機萬弩發勢若水漉肝方輿自風氣
朝報成斷爛欲通江海情孰與置郵傳忽憶去年遊湖
亭淪茗椀

去歲與子
言遊西湖

今夕復何夕風沙滿庭院

月夜登蘭州城樓望黃河隔岸諸山

月中望黃河滿目金破碎沙隄不受月因水得明晦城

影落山腰雁聲出雲背三更天宇高七月殘暑退樹動
風無聲坐久得秋態心知寒訊早預作雪山對暫與解
煩憂清露入肝肺忽聞伊涼歌河聲助慷慨河流去不
回明月年年在斟酌古今情幾人臨絕塞

渡黃河西岸行萬山中

積土如穹廬疊石如夏屋落日如車輪奔馳入荒谷風
含萬里聲草無一寸綠人言開闢時地水相抵觸至今
水裂痕縱橫貫山腹山腹俯千尋其下窈而曲當年海
底形一一森在目崑崙西來脈矯若龍蛇伏積氣盡東
趨尾閭成大陸神功不到處留此鴻荒局八月雪花飛
高峯削寒玉盤天入泱莽度地有盈縮欲窮變化根心

魚尾詩存卷三
遠境轉促翻羨北窗人臥游一丘足

辛亥八月二十七日度烏梢嶺

寒風八月烏梢嶺積雪千年古浪河從此南鴻斷消息
今愁爭似古愁多

平番道中

塞上西風吹土黃疏林辜負好秋光山如病馬吞殘雪
人似寒鴉戀夕陽生計何嘗關飽暖沈憂祇合待滄桑
天荒地老吾能說多恐旁人笑酒狂

宿涼州

雲與雪山連不知山向背殘日在寒沙婉孌得月態羣
羊去如水遠色倏明昧此景夙未歷垂老臨絕塞地遠

古愁多草枯殘壘在天山一線脈盤旋走關內流泉滿
馳道千里有灌溉巍然古重鎮四郊如擁戴風吹大月
來南山忽沈晦莽莽天無根靜與長城對

大雪登烏稍嶺

古浪河西流莊浪河東注兩水各西東中央此天柱昨
夜雪嵯峨長城萬峯聚眩光鳥雀靜構相龍虎踞巘
露空隙是水湍行處東水奔黃河西水穿沙去羣峯列
玉屏神工施斧鋸不見馬牙山呼風作哮怒

鹹水河

入谷復出谷我行鹹水河白日寒悄悄病樹猶婆娑生
存競枝葉人老當如何高原無定形縐疊如濤波洪荒

一片土風日能消磨遙峯匿光影薄暮愁山阿時艱付
悠繆行役懷坎軻觸感適然止慮遠傷心多君聽牧羊
兒高唱伊涼歌

歲晚乞病解官書示子言

初魄無光覺夜寒繞城冰雪路漫漫十年涕淚今何補
一病倉皇死未安擾擾世隨人意改冥冥天在霧中看
支離與子尋詩夢覺後園林已歲殘

辛亥除夕感賦時乞病留居蘭州城

冥鴻躑躅凍雲前莽莽高城夜可憐客至怕談新厯日
病閒聊補舊詩篇看人只合成孤醉守歲何因得早眠
惆悵難忘玉谿語可能留命待桑田

壬子元旦壬子

燭燼千家曉悲歡又一時人迎新歲日春入未花枝論
世含醒醉編年有信疑生存聊復爾庭鵲冷相窺
念念皆成劫生生各有因一年更始日雙鬢暫時人猿
鶴哀同調滄桑幻早春風輪彈指轉何處覓酸辛

述哀

預料事當爾此意至悽切况復身及之生死吾安擇自
吾成童時民勞得小息書生困帖括懷若抱殘缺人知
王室尊那計生事拙默窺朝野情不醉常兀兀人以官
爲家遂以官立國鄙夫競濡沫賢者或矯飾泥取古昔
名新理任汨沒我與世同化所學豈殊轍深悲來日難

匹夫與有責側聞憲法立迅疾萬弩發親貴集大柄四海各休戚所持進化理忽與初念別躑躅將安歸放情山水窟江南厭靡麗度隴苦蕭瑟風氣遞旋轉人心有南北奈何勢所激一發不兩月心知人世改愁到海水揭兵氣鬱不開關河信四塞去官如脫囚心死身則適改歲天氣佳濁酒容一呷晴風入寒沙泉動冰滑滑占天有生意望春猶恍惚誰與解煩憂如石不可掇

得壽臣三弟書

烽火連天白髮生開函收汝淚縱橫枉談陳迹埋經史剩有餘年到弟兄歸計忽興閭墓想驚魂如聽亂離聲傳家世業從今盡留待桑田學耦耕

長鑣託命吾何有夜雨聯牀老更難姑妄聽之容笑傲
萬無可說祝平安一生憂患知誰健十月音書隔歲看
縱使餘年好相見人間贏得是辛酸

紀夢

出門冰嵯峨欲游興屢輟胸中千萬山偃蹇不自得一
夢墮蒼莽山山弄春色結想每形役虛空有禪悅覺來
天氣佳初日在牆缺風遠市聲微窗虛塵影直濛濛換
朝氣擾擾觸陳迹生事如轉輪靜者窺其隙枕痕疊憂
患睡意能超忽還覓夢中山脩然映空碧

將至秦州避亂次陳子言留別蘭州諸友韻

國身通本春秋旨海內從教索解人絕塞散存專制體

角屑言不卷三
一塵今作幸生民少年慷慨猶摩劍亂後光陰看轉輪
夢醒莫愁身世改雪中一鳥已鳴春

自一條山出長城寄懷趙芝山都督

東風吹沙春無色白日荒荒草痕黑驅車不向中原行
藐然大地無空闊天低野曠不見路沙上行人愁日昃
一駝回首向長城絕似湖陰孤鷺立兩年放失江南春
翻從絕漠望鄉國故人臚別知我貧語我重來意悽切
乾坤已更新涕淚閱世難循舊車轍我行萬里蟻旋磨
君擁巖疆龍起蟄散兵無術絕輸輓窮邊例爲人棄置
時艱不作來日計改絃往往窮儒術人間何世我別君
君自憂危我蕭瑟塵昏躍馬一椀泉聊取甘芳解煩渴

泛黃河自甯夏達包頭鎮舟行雜詠

多少滄桑事艱難有此行窮邊飛鳥盡殘月大河橫出
塞人情遠還家白髮生明知覆巢下流涕說歸耕

日落長城窟悲風起賀蘭草肥知馬健地僻引渠寬石

色天西盡人心亂後看無爲怨回紇生事日千端

賀蘭山產

石過此均沙漠甘肅用董福祥捐款三十萬開甯夏

渠民利賴之去冬回隊至甯夏會匪已棄城遁回隊

入城肆淫掠殺良民二千七百餘人今尚十室九空生計無論矣

古塞名王府森森萬木青地形連朔漠國論弛藩屏世

絕天親賤兵荒互市停淒涼逐客令十口已僇仃

蒙古阿拉

善王居賀蘭山陰擅森林之利王與端庶人至戚庶

人減死依王生活近以國變王遂逐庶人奔甯夏蒙

地產鹽甘肅以庫帑租王

鹽池去冬以兵亂暫停

衝沙兩岸風舟疾欲浮空草色不成綠柳條纔吐紅意

中有春日身外卽鴻濛磴口雞魚賤傳聞西道通塞外多紅

柳短小叢雜舟人束柳條爲刷釜掃船之用過磴口千里不見人煙

西風不成雨吹入小單于棄地常千里神功有後圖水

低斜岸出天遠片雲無碧眼誰家子新開百道渠三套河有

法國教堂庚子被燬索償三萬金蒙古阿拉善王乞貸於甘肅不應遂以地償之近則渠工四達教民過七千

戶矣

草間黃帽影兩兩出番僧不問人間世長燃佛界鐙羈

縻天所棄迷信帝何能寥廓無興廢從茲泯愛憎舟行盡千

里僅見喇嗎數人騎馬馳逐草間而已

扁舟出鹼滌日薄晝冥冥岸蝕沙能語雲開風有形極

邊無戍鼓何地戴王靈留得千秋影狼居兩點青

嶮勞數十

里皆沙阜一白無際掘沙二三尺即得嶮遙見狼居胥山兩峯對峙舟人呼爲兩狼山

舟環烏喇特面面飽看山雜樹自生滅河流時往還氈

廬寒暑共國界有無間墾牧強權在邊民盡出關

河流曲折

繞烏喇特山行山即烏喇特府地分三旗以三公爵領之曰中公東公西公受盟長節制貽穀辦墾牧盡收烏

喇特一帶荒地

聞說陰山近橫流入地行夢懸青塚影風有黑河聲市

遠尋車轍塵昏壓土城萬方同永夜孤燭自分明

烏喇特山

連大青山即古陰山河流近山不似沙漠之泛濫矣距包頭鎮七十里烏喇山對岸一土阜土人呼爲昭君

墳然青塚在歸化城南二十里不在包頭包頭鎮土城甚大商務漸盛

家似離巢燕身如出塞雲窺天終自幸垂老厭多聞河

盡東南轉山從朔漠分紀行聊復爾大地本無垠

自包頭鎮

至朔河口卽古君子津
河轉東南流入山西境

亂後返金陵故居

畏兵如避仇十室九不返滿城無故人索居况歲晚庭
樹日以稀牆陰上苔蘚心知景物非冷處偏著眼花愁
來日難葉抱冬心卷晴雨殊未分荒荒一燈遠

十日閉門居洒掃有常課詩味貯別腸不受時論涓世
或有唐虞餘年事耕作荒穢久不治亂葉驚風過軒窗
亦云敝惜哉藩籬破

壬子除夕

到海愁無地親知共一廛真看成獨夜初覺有今年至

樂喧童稚餘哀祀祖先醉醒同一擲來日總淒然

觚庵詩存卷三終

觚庵詩存卷四

山陰 俞明震 恪士

癸丑元旦簡李梅菴道士

癸丑

舊歷仍新歲黃冠自腐儒
天甯惜矛盾世或有唐虞
賣字應開市游春莫問途
酒腸無熱處和淚飲屠蘇

哭劉姬

已訣忍再見返恨死難速
止我勿登樓呻吟抵牀褥
那知樓下人腸斷不可續
惟餘百悔心迸作一聲哭
避疫衛生言寧堪待骨肉
人病爾服勞爾病仰空屋
持此例平時感歎到傭僕
補過生無期天乎何慘酷
詩成付稚女是我酸辛錄
認父哭母聲開函時一讀
滄桑萬事改

吾衰景尤促回身視家人早死庸非福淚盡忽失笑待
我湘山麓

重至金陵故居弔劉姬

罷絮光陰萍滿池春風吹鬢白成絲明知生累翻悲死
難遣中年况近衰花竹每思初種日江山重見獨來時
人間萬事成追悔地老天荒卻怨誰

園居雜詩

入門百不適合眼常晝眠忽驚檐雀語恍如曉行天去
年脫命處黃河浩無邊婦孺暫相保惴惴親狼煙誰知
傷心事轉在生還年堦前衆草靡一樹獨兀然樹葉覆
我身樹根入黃泉黃泉我不見根葉常牽連爲報泉下

人吾衰不如前

晴日慣損花一雨泥中委託命本不長春光能有幾
煒花下犬見客垂兩耳三年汝猶活喪亂殊未已我作
病鶴看呼入竹林裏竹林風露寒不似臥花底

皇天不悔禍積非遂成理亂世多偉人聖言召羣毀廓
然去藩籬未睹宮室美一閨傾國維再裂到人紀不知
近何爲倏又大波起樹底聞扣門動色走鄰里深人含
一悲智士持兩是有如凶歲農顛倒晴陰裏嗟余憂患
餘脫屣到妻子忘身未忘世那便了生死

夜雨待蕭稚泉不至

逢君三月暮不似往年春况聽荒城雨同爲永夜人安

危燈共影喧寂樹成鄰坐久晨光動還看百態新

早泛清溪

清溪繞欄行看山如屋裏春風吹不晴晨光在烟水未
覺輕槳移隱隱雙橋駛綠草高上城下有女墻圯野航
舊畫船蕭瑟柳陰底柳陰茶竈香三五聚鄰里漸忘獨
行悲差有生還喜歸來未停午花木淨如洗鳥語傳兩
家山光爭一几送客還閉門高眠日斜起

偶成

再來仍隔世一笑是還家窗有三年紙春無十日花野
籐低掛筍暗水暖藏蛙料理閒中事安居願已奢

石徑春泥滿花籬暗草侵亂餘悲世晚人老閉門深客

以新醅至天教霽月臨離離牆外影栽竹漸成陰

游半山亭

偶然占一壑事過如秋煙如何此亭名千載惟公專後
人惜古意添築屋數椽上結雲作頂下借石爲闌渡葉
寧知數藏山無礙寬一朝構兵火瓦落如奔泉淒淒霧
中眼誤作臺城看此邦多喪亂好春無百年幽草勝花
時此恨公能傳公詩綠陰幽草勝花時我身如獨樹不死常兀然
不見綠陰底破網蛛絲牽潔身遠蚯蚓那復計孤懸

焦山松寥閣夜坐

月黑樹蒙茸驚鴉入窗裏團團一山霧江勢來不已檻
外鐙忽明舳艫走千里我亦東西人往來送江水滔滔

有今日惜此中流砥掛眼山無多到海吾衰矣僧寮繩
牀平濤聲在席底傾耳來睡情平心得坐理始知倚樓
時妄念雜悲喜蘿徑非不深真隱人有幾

同伯嚴後湖觀荷

城頭紫煙低城背莽蕭瑟江山不滿眼萬荷補其隙初
花弄光影顛倒一湖葉繁聲疑雨來微涼散空闊小艇
不容篙趺坐波平膝欹岸出荒洲稍見兵火迹當年岸
幘處廊空積潦入倒影兩禿翁風亭坐超忽清香滿殘
照綠意上鳥翮遺世渺愁予見汝亭亭日溟渤非不寬
萬事在眉睫

暑夜同子大伯嚴泛舟三潭

厭亂託逃暑適可聊自娛况有素心人同就湖上廬今
夜天氣佳雨收片雲無相攜泛明鏡艇子輕於鳬滿載
萬斛涼衝煙出菰蒲亂星倒山影浸入碧玉壺三潭風
露香縹緲化人居佛鐙隱荷蓋橋語驚行魚奇石鬼皴
面高柳螢懸珠翼翼三角亭一暝收全湖山行多歧路
愛此波平鋪窅然入深黑遺世真吾徒

游靈隱寺

靈鷲下層霄翼覆東西峯仙山此堂奧鎮以飛閣雄我
來喪亂餘三年一孤筇松柏見威儀雙澗迴天風森然
千佛場馳道青濛濛高蟬無停響靜壑窺玲瓏諸天在
咫尺喧寂皆靈蹤冷泉出亭根照我再來容汲深性不

滅清極聖可逢生平尤悔心不爲寺樓鐘一鳥馱禪去
下方雲正封

湖莊曉起

臥聞菰蒲聲疏櫺覺風入滅燭延曙光荷邊有微月溼
螢飛漸稀陰陰一湖白老夫常早起顛倒忘歷日但覺
春風時看看看到暑末此時東方高水禽先聒聒清露不
盈頭世事如亂髮暫避眼前人終愁秋後熱安得濃淡
山變盡滄溟色

湖莊示子大伯嚴

分得西湖一角涼曲房低檻待秋光生慚亂世能容我
靜覺高荷已退香人意淡如山欲暝歸期愁與月相妨

放歌同是無家客
水枕風船老此鄉

讀散原鬼趣詩

夜讀散原詩矮屋環冬青
敘亂託鬼語叱詫來精靈
我無寂滅想閱世終冥冥
萬古一髑髏黠者先逃刑
合眼夢唐虞糟粕遺六經
齊民豈有術魑魅能潛形
竹梢寒月來鐙影如孤螢
窮巷與世隔人鬼無畦町
微吟坐達旦一鳥窺檐聽

園竹

培土竹樹根日脚下牆屋
鄰翁荷鋤來寒天吾汝粥
城中幾名園亂後遭踐蹴
人心無瓦全草木含親睦
今日晴不風煙洗數竿綠
交影上危亭輕陰脫拘束
豈伊耐

歲寒心虛了無觸坐送蕭蕭聲百憂甯可贖

園柏

種柏青溪旁古色上牆屋十年憂患人樹此嵒峻骨鬱
鬱歲俱深童童立可獨今年一冬晴河乾凍龜縮惴惴
愁四鄰荒園日氣濁香葉不受凋照我鬚眉綠全命慄
冰霜居安對雍肅從茲翦荆棘一寒閉門足但恐旱象
成明年無此福

寄李梅菴道士

滄桑一道士矮屋坐蕭爽得食有童心黃冠仍大顙有
時得名蹟阿弟共欣賞醉學石濤顛灑墨大如掌人間
果何世破筆入蒼莽昨聞阿弟病日日趋車往車往復

車來的的關痛癢觀君蓄弟心觸我救時想出世莫出家酸辛告吾黨吁嗟解人難思君徒怏怏

寄陳仁先

瀟灑陳孟公有俗無不棄手寫詠菊詩閉門自成世將花入性情不觸色香味千曲無盡思蕭寥在腸胃昨夢坐茅庵君持菊譜至上粘乾葉花枝枝有題記笑指枯目僧謂是花中意覺來渾不解清境倏已逝明月滿竹林獨照無夢地蕭寥復蕭寥高天動寒吹

歲暮園居雜感

漸喜知聞斷閒門各一天還家仍獨客亂世有餘年畦菜經霜碧江魚入市鮮老夫唯果腹無酒亦陶然

稍見通鎡貨殘年米價平月圓知漢臘巷哭有驕兵帥
府徵歌舞遺黎算死生出門流水斷愁絕一冬晴

窮巷得鬼趣客來聞鳥譁稍知人改世無礙犬離家僕
守寒宵柝園收隔歲花獨留乾淨土莫遣種桑麻

安危從可託北望一踟躇世變憎吾老眼空聊爾娛未
忘晞髮感終惜竊鉤誅殘臘垂看盡荒城萬木枯

寒日如煙淡遙峯與雁平微吟萬象待早起一身輕對
局搜殘劫攤書擁百城不親無益事辜負有涯生

小閣留賓處寒山不改青悠悠萬人海落落兩晨星遜

世全哀樂忘身自典型蕭蕭一庭竹留爾不曾聽

李梅庵陳

仁先留
居數日

傳呼散冬振溪岸築場寬稚子牽衣到寒鴉倚樹看卜
年村釀薄敲凍井泥乾莫問浮生事安危夢已殘
家在未忘俗米鹽殊有情編籬鄰犬入翦樹亂蓬生衣
敝從吾老身閒覺世輕且虛臨水閣留待讀書聲

癸丑除夕旅居上海

臘盡知何世稱觴笑比鄰計年仍此夜送老又明春入
市忘新歷無家作幸民未成浮海願燈火認迷津

初春重至西湖甲寅

曲檻陰陰水繞廬雨花風葉看西湖無多來日思前事
剩有春光賺老夫向曉亂山分紫翠隔年寒漲沒菰蒲
何須更覓傷心句滿眼煙波鬢影孤

角屑詩在卷四
七
園居早起

夜枕數鐘聲心定萬緣了醒睡界未分清思墮莽渺燈
暗牕影來朦朧覺春曉甜香入簾幕花氣在襟抱老與
世情疏所得惟起早中庭露未晞三五見煙鳥懸知日
中事萬類各饑飽人生無限情但覺初境好保此平旦
心天光入窅窔

甲寅除夕時久病初起

萬方多難日今夕倍悽然家祭存殘臘人心有舊年養
疴貪睡早移燭得春先幼女分梨栗吾衰祝汝賢
難向庸醫說深杯掩病容有家甘自放憂國竟何從樂
憶兒時味詩尋亂後蹤告存應自笑重數隔年鐘

石遺社長齋中宴集卽事賦詩乙卯

石遺古君子疏瘦如寒竹閉門非此世甯受時名牯一
飯每矜嚴選客常不足滄桑眼底人屈指幾名宿不見
亦不思偶聚忘拘束老味淡處真春光閒可掬窗外花
始蕾餘寒怯春服若從新歷推已過櫻桃熟謔笑有今
年恢詭迷前躅末座兩少年英姿并珠玉定知哀樂深
不與世同俗相對數甲子人生如轉燭我病久無詩逢
君一擊觸咄咄百憂間醉飽但捫腹短章聊報君懶曠
如逃塾

乙卯上巳日脩禊十刹海分韻得灑字

八年不到十刹海潑眼春光忍拋捨舊時燕子再來人

相逢同是悠悠者詞流老去抱冰死猶傍宮牆作春社
倚樓煙柳斷腸處斜日蒼黃亂鱗瓦旦暮承平又一時
甕中春色誰相假東風作惡塵土飛咫尺湖光不忍寫
哦詩賭酒盛文物順時哀樂吾聊且未死尙思來日事
故園櫻筍初盈把料量春事不如歸經天淚向蒼茫灑

乙卯除夕

一笑真成幻堯天入禹天繼承無舊厯疑似又新年但
覺兒童長終知身世懸春王誰秉筆淒絕紀元編

夜坐丙辰

微聞花氣夜沈沈入世何人覺病深殘月漸移成曙色
寒風忽起結層陰悲歡自造原無事醒醉相望各有心

還向紙窗尋我相一鐙明滅去來今

睡起

穩卧繩牀身世平蘧蘧睡味比茶清夢長夢短了無迹
窗暗窗明過一生讀史難通今日事聞歌不似少年聲
晴光偶動春游興江路微茫雨又成

雨後湖樓曉起

水鳥無聲風滿亭起看微月在南屏雲山款我秋前雨
露葉如沾曙後螢思逐遠鐘同脈脈身經殘夢但冥冥
養心漸喜知茶味預汲寒泉入夜瓶

丙辰中秋日雨約同人飯於法相寺

湖居不見中秋月偏向僧樓坐雨深避世漸諳蔬筍味

入山終負水雲心
人生適意每不足
眼底有詩何處尋
還我一庵聽說鬼
澗松巖桂各蕭森

中秋集法相寺和子純丈原唱

涼雨霏霏釀桂天
寺樓衣薄欲裝綿
客真淡泊渾忘敬
僧解周旋卽是禪
儘有寒山期晚歲
更無明月記今年
餘生甲子山中歷
看到秋花始黯然

丙辰重九龍井登高

老覺人前萬事非
登高望遠獨依依
難披榛莽凌千仞
已許湖山共落暉
世改性隨龍不滅
天空雲與雁同飛
年年此會成今古
短鬢蕭疏我自歸

登高再和仁先一首

病起逢君作重九絕頂拄杖相追尋秋光爲我洗林莽
天界自高無古今笑聽野老說城市坐待山氣分晴陰
攜壺賭酒少年事俯視落照同幽深

子純丈詩來和新居次韻奉酬

編籬除草屋新成真樂翻從寂寞生喜就高人課鹽米
臥聽山鳥卜陰晴溝容積水通荷路樹捲秋風作雨聲
乞得甘泉留茗飲夜瓶音裏隱龍泓

湖居與仁先結鄰賦呈四首

世轉無窮境人生有收束老尋湖上廬滄桑了無觸一
籬分割據圖史羅百族借君寒菜畦畫此井田局我自
娛寂寞君還課耕讀童稚稟禮法山水含親睦晨炊松

柏香書聲過牆屋日脚淡廚煙飯熟書還熟此是承平
聲念之淚盈掬汶汶五十年舊夢今可續

平湖寒不風曙光隱微月自起開柴扉霜籬犬爭出昨
宵聞夜漁鐙火倏明滅驚爾花底眠狺狺任呵斥日出
辨鳥聲又入東鄰壁心知一飯難甘充兩家役跳浪非
不豪帖耳聽悚息老至惜物情生事同悽惻君看麋鹿
性忍受嗟來食

飛鳥入深谷遺我以窅然幽境不可逐坐看風爐煙韓
子就今懦蒙叟尊神全苟能通此意卻病惟癡頑動馳
域外想未覺心地寬吾廬適可止但取遠與偏花竹有
新意雲水皆恬安飽食肉邊菜端學忘家禪妙竅觀如

何還我蕭寥天

西湖天下奇移步各殊形傳之畫師稿意匠存模型遂
令游觀客顛倒遺性靈老夫獨迂怪築此背湖廳懶焚
天竺香不禮三潭星編籬闢幽徑種竹可中亭南北兩
高峯列几如壘瓶霜天色黝黯補以湖面青置身入閒
冷借景皆空冥東鄰有高士避俗常獨醒取舍定先我
隔籬呼與聽

吳子脩丈約游西溪

西溪九月水清絕流入法華浸山骨掠波艇子輕於瓢
滿載秋光款游客山僧解事列藏軸覓徧題名感陳迹
卷中同是滄桑人後死重來倍悽惻主人避世重鄉賢

指點當時隱居宅木主親題月上名荒庵香火餘芳潔
百年人事忽翻新野荷花現女兒身溪中草花蔓延土
名革命草亦名野
水荷花辛亥
後始有之影堂遺掛等閒事廟貌湖山大有入

游西溪歸泛舟湖上晚景奇絕和散原作

西溪暝煙送歸客艇子落湖風獵獵蘆花淺白夕陽紫
要從雁背分顏色頽雲掠霞沒山脚一角秋光幻金碧
欲暝不暝天從容疑雨疑晴我蕭瑟憶看君山元氣中
滄波一逝各成翁請將今日西湖影寫入生平雲夢胸

游雲棲謁蓮池大師塔

雲棲背西湖浩蕩宜江景到門山又合步步入孤冷蓮
池舊道場僧衆具綱領略參入世法肅客進甌茗無住

方味禪入林忽思筍率性本自然覺妄異俄頃深廊晝
悄悄寒翠上襟領還尋祖師塔飛雨過峯頂萬竹無一
斜煙雲自嚴整始知物象微戒力常昭炯嗟余脫世網
頽放失脩綆坐收海潮音勝聞晨鐘警窅然吾喪我靈
境倘可引

六和塔

鈴語層層風雨寒支筇人老怯憑欄之江到此霸圖盡
病雁橫空來日難肯與西湖作屏障可容東海鎮狂瀾
潮痕不沒雲棲路佛火檣鐙夜夜看

大雪後偕蒼虬入靈隱寺同賦

靈山一夜雪萬象立於定入門玉交柯負重松逾靜凍

溜不掛檐萬瓦皆明鏡石佛垂白眉披煙露寒脛淠瀼
洞牖開幽極得鳥敬掩關千層雲破寂一聲磬上接惟
鴻濛俯瞰窮究竟見淨不見土所見非佛性拄杖我歸
來無土亦無淨

蒼虬詩有我來真空
回見淨不見土之句

錢厚齋投詩贈梅二樹次韻奉答

連陰四海昏一雪千山潔凍鴉如我閒朦朧戢雙翼故
人贈雙梅高與冰簷接鋤根去泥滓掛影補籬壁春意
破鴻濛花氣通山脈心從冷處求室有幽香入滅盡少
年迹毋爲煙景惑窗寒一人曉天空萬花寂皎然丘垤
平何處尋荆棘避世全吾真日醉孤山側

丙辰除夕

改歲天無異窺人燭有情駢枝五除夕冥想一儒生雪
盡門初啓巢危鳥不驚寺鐘不停響誰認隔年聲

丁巳初春至獅子峯丁巳

山居適山性趣與游觀別斟酌物外情陰晴含悱惻峨
峨獅子峯匿影萬山窟甕底海潮音煙中古苔色泉響
不到門頓覺聲聞滅山僧驚我老惘惘成今昔龍泓荇
藻橫人生事如髮自性本不存去住空皮骨忍作無情
游拄杖隨所適谷口漸通樵人家枕斜日春風入雲隙
炊煙相與白暝色認茅檐廚香筍可食

同潛道人登會稽山謁禹陵

漾舟尋禹穴百里同春風桑麻翳平野鉤畫千渠通叢

爾海東隅樂利神所鍾千山擁藜杖扶我入清雄俯驚
巖壑奇始悟積水空在德非馨香闢此五畝宮幽懷忽
整肅萬籟皆笙鏞煙雲到海盡浩蕩思神功道人精地
學縱覽登爐峯桑田變滄海此理焉能窮滔天來日難
蟻磨隨西東

四月初六夜同病山泛舟鑑湖

柔櫓輕鷗外花明柳暗天一春能幾日雙鬢各衰年欹
枕山如幄推篷月滿肩渺然滄海思清夜斷橋邊

登柯亭七星巖

幽意如有獲巉巖晴復陰竹涼通海氣酒好入鄉心鑿
石雲根見忘機鳥路深逝波人不覺潭影日蕭森

登快閣訪姚隱士不遇閣多藏書放翁故宅也留

題一律

濁世無隱地閒門只獨醒書留儒者事山向舊家青一
舸通滄海疏窗納曙星重披劍南集鄉夢久飄零

劍臣雨中過觚庵留二日

與子廿年交冠裳弄恢詭動馳身外名妄念參悲喜真
到天地翻相看只如此出世豈空言吾廬枕秋水愧無
辟穀方炊煙時一起等身若衆木回心向初地始知寂
寞中無懼亦無悔山鳴暮雨深秋光在鐙底了了去來
今悠悠吾與子隔水倘結鄰雲山從此始

法相寺歸遇雨

寺門深不見山靜澹忘歸鳥已知人處雷真逐雨飛壓
湖天漠漠迷路竹依依拄杖看泉落勞生未息機

曉起滿覺壠看殘桂

乍乍紙窗明悠悠百蟲絕漸生今日意開門步殘月言
尋滿覺壠遠見炊煙白叢桂無寒花蔥蘢避秋色香後
悟真空雲山自高潔十年滄海事六度重陽節悲哉支
離叟獨向蒼茫立

獨游靈峯寺

野寺泉無源名山僧必俗不尋山外山轉受煙霞梏靈
峯十里遙秋色滿平麓微聞鐘磬音寺門隱喬木想望
諸天高步步入幽曲僧遇無言時松經劫後綠蒼然古

圖畫對此心神肅獨游取空象人境兩無觸偶然意所
是雲山徒碌碌曳杖出青冥止觀吾亦足

由六和塔歸觚庵偶成

何因分覺妄漸喜斷知聞佳客來如燕晨炊錯認雲一
涼秋到骨幽極鷺能羣剩有登高眼悠悠送夕曛

丁巳重九日登煙霞洞讀仁先六截句感賦卽贈
歸雲如箭山如馬直壓錢江出胯下紛紛朝暮亂雨晴
洞口黃花無一把去年龍井看落日秋色招人薦尊罍
一年容易君南歸心自沈冥氣瀟灑入山以後無甲子
我與秋山共清暇傷高回面參古佛頑石嵯峨鐘磬啞
君知此意得真象無主秋光任揮寫蒲團題記六重陽

君詩破壁攀天一端
午傷高啼淚六重陽攀天留待重來者

七里瀧登西釣臺弔謝皋羽先生

山川以人重風日信清美子陵有釣臺遂專桐廬水盤
曲七里瀧舟行如甕底當年蹈海人晞髮曾經此天在
萬山中陽鳥匿葭葦一慟上西臺殘年哭知己人間果
何世來日殊未已空存汝社名留作滄桑紀我來九月
暮拍拍鳬雁起孤筇與夕照蕭瑟同千里傷高莫回首
臨流先洗耳難酬烈士心悠悠閱衆死西風颯然來歸
去吾衰矣

登葛嶺初陽臺

朝尋外湖山暮踏裏湖月煙水小朝廷南渡君臣熱湖

山非霸圖代謝同駒隙至今葛嶺旁蜃樓幻金碧今日
天氣寒憑高風獵獵錢江背城去團團一湖白從知止
水清不共驚濤沒悠然物外身眼底惟秋色雁背看斜
陽霜天下紅葉莫問半閒堂草間鳴蟋蟀

韜光寺

同在山光中奇峯不足數絕頂名韜光萬象待吞吐我
從靈隱來幽境出廊廡剖竹引泉流捫蘿接蟲語含霜
衆壑陰衝風一雁舉欲窮滄海觀惟見頽陽俯窅然入
鐘界撥霧迎寒杵洪聲起何世激蕩成今古生平哀樂
情聊借湖山補不學春游人紛紛論晴雨

和散原游桐廬至七里瀧釣臺作次原韻

獨昵近湖山幾失煙江景孤篷與鷺爭漸入桐廬境銜

江接紅樹斜斜復整整雲光淡相染天無成古錦山水

無定形奇變出心影未成浮海願彌覺天機永暮傍桐

君山旅夜抱虛警相逢莫問名夜有警兵詰姓名出世先止飲

煙波有戒心身世成懸癭不見披裘人漁火明孤枕

晴江啼畫眉煙嶼如浮杯有山不真隱游釣皆凡材鬱

鬱旋螺門一水爭滌迴風日不到處古祠傍山隈釣臺

東西峙不受羣峯排前年舊鷗鷺相見如驚猜亂世無

隱地焉知我重來筇邊落日盡淡淡煙光開依稀痛哭

記留與今人哀苟乏超世見江山無好懷臥石滅殘字

斑駁千年苔絲風重九鼎天意甯徘徊

卻病始登山三度憩祠屋風日老蒹葭欲往迷前躅從
容理歸棹水流山簇簇暮色蒼然來人天渺一粟漏釜
燃溼薪煙篷坐瞑目散翁酒腸空三子但捫腹石欽仁先絜先
浪游有饑飽一笑境難續袖中亭林詩絜先攜亭林集應向西
臺讀杖策追光武亭林句羣雄亦粥粥莫道客星孤終古
桐江綠

偶成

又見炊煙出樹頭參差野水暗通溝胸羅怪史支離叟
坐有黃花爛熳秋宜雨宜晴天亦暝爲陵爲谷我何求
西興鐘鼓無人問遠作空山一夜愁時有紹興不靖之謠

丁巳除夕

一閨真成醉殘年事可哀更無餘日待誰遣早春來漢
臘存芻狗深杯憶舊醅風枝見棲鳥爲爾一徘徊

游花塢至白雲堆僧舍午飯

戊午

春山無盡藏有雲自深曲隨處著茅菴窅然寄心目雲
根函一窗萬竹深如束日午雲不歸濃陰補山綠淨理
不可舉鐘聲來斷續孤筇身外身幽往迷前躡檐隙坐
相忘春去了無觸古佛野僧旁茶香飯初熟一飽不願
餘人生幾陵谷

游破山寺睹翁常熟師遺墨感賦

出郭晨氣清鳥聲雜悲喜初日明高林山在綠陰底何
處覓禪關潭空竹煙起鬱鬱松禪翁放逐曾經此寺僧

索題額留作藏山紙神味在青冥潑墨皆雲水從知憂
患心妙契清淨理前游已隔世樵徑青未已山隨人意
深萬事滄桑裏

登劍門峯拂水橋

魚貫出層嵐帽檐欹曉日咿啞答鳥聲風輿坐超忽直
上窮窅如下臨詫奇絕雲與石爭山怒泉抵其隙迴風
一震盪喬林濺飛沫危橋通兩崖關鎖見氣力曳杖入
清雄覓我經行迹十年滄海心未與鐘磬隔人生重迴
首春光有今昔不見鶉鴒峯墓草萋萋碧

止翁氏墓廬謁常熟師墓

鶉鴒峯前墓草黃眼中不是舊春光百年喬木柯條改

半畝空園棟宇荒並世悠悠孰功罪沈憂悄悄到滄桑
一身結束關朝運北望 崇陵事可傷

暑夜雨初過平明泛舟出南湖

昨夜南山雨雷峯淨如拭澄波倒天影雲來滿湖石
石底一星明餘光隨槳沒忽驚鷗背紅荷邊上初日曙色
分遠近湖光有明滅漸覺東方高市聲出煙隙日計在
一晨生事紛如髮蛻世吾何曾替人愁午熱萬事不如
歸南湖風獵獵

送大維姪赴美國入哈佛大學

厭世非人情衰年望子姪送爾萬里行百感集嗚咽自
吾成童時艱難生計拙人視官爲家學與世同轍兀散

聊自娛游心慕莊列牽蘿補屋難坐視藩籬撤爾往晰
新理淑身卽救國並世無學人人心遂盪決常懷風俗
憂勿與性情格爾父病且衰我死更旦夕國危家偶存
所悲在來日來日吾安知極目海濤闊

戊午重九日病起至金陵舊居和散原見贈之作

南高峯晴北峯雨攀天幾度悲重陽

蒼虬去年登高詩
有六重陽之句

今年重陽兩病叟閉門與世殊滄桑園木自凋生意在
紛紛野卉爭秋光慣將歌哭託醅酹因病止酒天主張
由來老至各異境淡處得趣皆芬芳菊前桂後天清曠
無主鍾山屹相向何必登高看晚晴青溪自古多惆悵
瘡雁南來事又新斜日滿城無故人結鄰與子共花竹

天許江湖作幸民

病甚口占

病久先天覺時危
識命輕真看成末
世何境是來生哀
樂隨年盡星河向
曉明了然無觸處
夜氣與心平

百劫成今日生年
擾攘中夢邊無悔
懼鐙外卽鴻濛漸
悟形骸累終慚淡
泊功有涯應自惜
回首萬緣空

觚庵詩存卷四終

觚庵集俞公恪士之遺詩也憶辛亥之春余相從度隴
崎嶇關塞歷時五旬乃抵蘭州時維五月隴上草青重
襪猶寒麥苗始秀民生朴嗇憔悴山林陶穴以居汲泉
而飲公愀然不怡穆然深思綢繆興學頒布科條滯義
畢宣宏綱聿舉拔其髦彥啓其荆榛自夏徂秋勤勞夙
夜八月武昌變起陝西繼之公時方巡視涼州聞耗而
返以隴上道斷器械不完亟謀定難之術飛書馳一介
間關走秦告隱者某翁暢述君憲民權之利弊某翁韙
其說輿疾往說秦師止不復西升長二帥和會遣將東
邁以公攝甘藩綜軍儲公貸金於晉商勸分於僚案裕
軍食和諸將鉏內宥隴疆乃固論者謂有寶安豐風規

隴師旣東屢有克捷進圍乾州將臨渭水而輦轂和耗
日至公知禹鼎將淪王綱解紐憂勞成疾上書乞休或
說公曰長帥耄矣他日代者舍公其誰踵尉佗之故事
猶可有爲也公曰時不我與誠效莫申大夫出疆知守
節而已遂于臘月十日乞病閒居初春南轅至狄道阨
於秦州軍亂而返迨乎暮春始循河套經塞外陟居庸
而達京師旋至奉天視弟聯鑣而南青溪之舊宅已荒
晚構室西湖窮幽躡景擊筑酣歌迄以終老以戊午十
一月廿二日卒于湖上年垂六十矣公雅有局量篤好
名理其爲詩也鎔鑄性靈據少陵之忠愛蔚簡齋之深
秀蘊莊列之高致籠魏晉之清談如度隴出塞居越諸

篇是已又善釋莊嘗曰陰陽人事患傷吾生靜持以慎
不觸則解又曰盡年而游不損逍遙盡年而盡無擇曼
衍又曰達人以天爲照以懷爲藏又曰虛而遨遊萬物
莫窺其罅物之相感禁之則愈相搖所論皆微至可謂
知道者矣元枵離次寒冰淒然述續紀言比蹤嚴杜人
琴竝逝攬涕書之廬江陳詩

上海聚珍
宋印書局
印



#397